

ЛҮИМА СЭРИПОС

22 сентября
2016 года
№18
(1132)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: luima@ugracom.ru

Основана 11 февраля 1989 года



Л. Теткина вѣрум хури

Хурит Оксана Маслова, «Торум Маа» музейт рўпитан нѣ, пѣслым ълы.
Тав Ханты-Мансийск ѱст ѡлум ялпың хоталт «История кедрового края» намп
суссылтапт рўпитас. Ты урыл 4 лѡпсыт ловиньтѣн.

Ты
номерт
ЛОВИНЬТѢН:

Нѣвраманын
ѱргалым
янмалтѣн

3

Вѡр
ѣл-яктын
мѡхум кассыт

6

Таѣжный
пѡвылт
ѡлнѣ нѣ

8

Тав ѡпатѣ
Сукурьяныл
ѡлыс

12

Соссаң мѡхум
ѣрнѣ нѣпак
щѣпитасыт

14

Оста нэпак таратаңкв вöвыглавесүв

Ювле хульгум сатыт 18 хөталэт Россия өлнэ мав янытыл пёрияп вәрмалъ ми́нас. Мән округувт Государственный Думан, Тюменский областной Думан, округ Думан, касың район ос үс такви Думан депутат махум пёриясыт.

Ань тара-патыс, хоты политический партият нөх-патсыт, ос хоты хөтпат мирн пёриявёсыт. Төват пёриим хөтпат наманыл ты лаввёсыт. Тән ань савсыр сакконыт мән магсылув хансуңкв ты патёгыт. Ос ты хосыт элалъ өлнэ олупсав тах та мины.

Государственный Думан одномандатный пёриан мат ты тит хум хөтпаг пёриявесыг – П.Н. Завальный ос А.Л.Сидоров. Ётылнув «Единый Россия» пар-

тия палыл тув хөтпат ос тах пёриявет.

Тюменский областной Думан ты хөтпат нөх-патсыт: Ю.С. Холманский; В.А. Нефедьев; А.А. Аносов; Б.И. Богославец; Г.А. Резяпова; И.А.Иванов; С.В. Дубровин; И.В. Лосева; Е.М. Макаренко; Ю.А. Елин.

Округ Думан ты хөтпат магыс мир сав нэпак таратавес: Л.В. Михалко; П.М.Созонов; А.М. Осадчук; А.В. Филипенко; В.А. Филипенко; С.Ю. Дег-

тярев; И.В. Винников; С.Е.Елишев; А.И. Сальников; Ю.И. Важенин; И.С. Кандаков; Р.Р. Айсин; Л.А. Малышкина; А.С. Филатов; С.А. Кочкуров; А.В. Андреев; Н.Л. Западнова; Б.С. Хохряков; С.С. Великий.

Пуссын аквьёт округ Думат 38 депутат рупитаңкв паты. Ань онтоловхуйплов хөтпа пёриявес, мөт хөтпат наманыл ётылнув тара-патёгыт. Тән ос политический партият щирыл тув үнттавет.

«Единый Россия» партия ват нупыл ат хөтпа депутатыг округ Думат рупитаңкв патёгыт, ЛДПР партия палыл – хөт хөтпа, КПРФ партияныл – нила хөтпа

ос «Справедливый Россия» партияныл – тит депутат-хөтпа.

Касың район ос үст танти депутатаныл ос пёриясаныл. Ань мирн таратам нэпакыт ёмашакв ловиньтавет, ос үщлахтын хөталытт йильпи депутат-махум наманыл пуссын тах лававет.

Мән округувт савыңпалэ пуссын мир «Единый Россия» партия магыс нэпак таратасыт. Тән юи-паланылт ЛДПР партия нөх-патыс, КПРФ партия хурмит мат олы. Тувыл ущ «Справедливая Россия» партия.

**Валентина
ВАСИЛЬЕВА**

Шахматы ёнгил öвылтыт потыр öлыс

Ты этпос 15 хөталэт РИЦ «Югра» колт ляххал тотнэ махум акван-атапалвёсыт, потыр шахматы ёнгил урыл öлыс. Тув Ханты-Мансийск үс кұщай ос округув янытыл шахматы ёнгил Федерацият пуңк тотнэ хум – Василий Филипенко ёхталас, округув янытыл физический культура ос спорт департамент колт кұщайг өлнэ хум Игорь Губкин, «Югорская шахматная академия» колт кұщайг өлнэ нэ Галина Ковалёва ос шахматал ёнгасан пыгрищ Георгий Рябов ёхталасыт.

Ань 2020 талт Ханты-Мансийск үст Всемирный шахматный олимпиада варавет. Ты урыл Василий Филипенко тох лавыс: «Ты ёнгил мән үсувт вәруңкве ань ма янытыл өлнэ Мирхал шахматный федерация Конгрессыт рупитан мир пуссын қасащасыт. Ты магыс мән номта-

нув ёмасыт. Ты тәла палт мән нёлолов арыг тал ты рупитэв, 2010 талт тыт май Шахматный олимпиада öлыс. Таимагыс мән өлнэ мав ань ваве, үсув ос та пёриявес».

Игорь Губкин ос тох потыртас: «Округувт савсыр олимпиадат вәтихал вәрыглавет, таимагыс мән ань ты

рупата вәглув. Ам номсәгум, ты яныг ёнгил кос мөтыт тал вәрнуве те, маныр эри мән пуссын молях щёпитапнуув.

Ты ёнгил вәнэ ма янытыл өлнэ мир мән мав ос үсув колыг лавияныл, тыг тән касыңёмт ёхтүңкве вөрмёгыт. Мирн вәнэ хөтпат таимагыс тыг вәтихал та ёхталёгыт».

Округув янытыл ань шахматы ёнгил палт сав касылыт вәрыглавет – ныврамыт ос маньлат махум коньпал савсыр организациятыт рупитан хөтпат халанылт касёгыт. Галина Ковалёва лавме щирыл, Югорский шахматный академия колт үщлахтан хөталыт ат öлыглёгыт, махум тот касың хөтал ёнгёгыт, ханищтахтёгыт манос касёгыт».

Ань тыгыл элалъ касың школат ос спортивный колт ныврамыт шахматы тәла ханищтаңкве патыяныл. Ты тәла палт пуңк тотнэ хөтпат округ янытыл яласёгыт, махум магыс мастер-классыт вәрыглёгыт – 43 савит тамле тәла öлыс.

Ищхыпың ут хосыт ос ханищтёгыт. Ань округ янытыл 15 сөтыра арыг ныврам шахматал ёнгасёгыт, яныгхөтпат ёт – 18 сөтыратем.

Георгий Рябов онтолов тәлэ төвлыс, тав нила тәлэ төвлум пәсыл шахматал ёнгасы. Ляххал тотнэ махум нупыл тав тох лавыс: «Ам 2020 тал поратёмтнэ Мирхал олимпиадат ёнгүңкве таңхёгум. Тот элы-хон махум ёт ёнгүңкве рөви, тәнаныл йильпи матыр ханищтаңкве, ос тувыл мөт хөтпат ёт каснэм порат нөхпатуңкве рөви».

Светлана МАТВЕЕВА

ЛЯХХАЛЫТ

«Хотал» нампа театр 15 талэ төвлы

Юи-овыл хультум талыт тан акваг пумыщ спектаклит щёпиталэгыт. Маныр ёнгилыт тан ань щёпитасыт, ты урыл кұщай хум Е. Литвинчук, режиссёр пыг А. Тургачёв ос артистка аги А. Могульчина потыртасыт.

Атхуйплов тал сыс артистанув сав ман вёвыглавёсыт. Тувыл юв

ёхтэгыт, щагтым мот спектаклит элалы та щёпитэгыт.

Ты этпост Финляндиян ялсыт. Хон махумн тан ёнгиланыл сака мұстыс. Ань ос Красноярск ұсныл ёхтысыт. Тан тув фестивальн вёвиньталвёсыт.

Ань ос ирландец хум Мартин Макдонах ос эвенк хум Александр

Латкин хансум нёпакагён хосыт спектаклиг щёпитасыт. Хурмит спектакляныл мань нёврамыт магыс вёрияныл. Тананыл сунсуңкве махум мань таквс этпос вёвавет. Ты урыл ман ётыл янас потыр хансёв тах.

Тамара МЕРОВА

Нёвраманын ўргалым янмалтэн

Ювле хультум сатыт округт олнэ латың ат хўлтнэ нёврамыт лўль тёланыл ёмщакв щёпитан щирыл Ханты-Мансийск ўст хаништап олсы. Тамле нёврамыт тёланыл ёт рўпитан махум акваг тув атхатыглалсыт ос пуссын олғылан вёрмалит урыл потрыт хўнтлысыт. Тувыл тэрвит вёрмалит элалы ёмщакв щёпитан магыс халанылт потыртасыт.

Овлэт Татьяна Черкашина, округт олнэ нёврамыт тёланыл уральтан комиссият кұщай ваңын нё, тан рўпатаныл урыл латың тотыс. Мори хайтнэ ос латың ат хўнтлын, мори капыртан нёврамыт магыс сыресыр хаништапыт Юграт вёрыглавет. Молты тагыл тан савсыр рўпитан колыт ёт «Подросток» нампа уральтан нак вэрёгыт. Ос хотты лўль наkn патнэ агиришитн-пыгришитн матыр ёмас вёруңкве нётэгыт. Тан туи сыс ўшлахтуңкве тотыглавет, хотты ман рўпитаңкве вуйлавет. Тувыл щаняныл-ащаныл ёт ос потыртэгыт.

Ты нёврамыт мот хотпатн сымталыг ос кантыңыг ул вос ошвёсыт, акваг уральтавет. Агит-пыгыт ёмас олупсан хаништан кинал щёпитавет ос сусылтавет. Лўль тэрпи кёлптърсытн ул вос тұштэгыт, вина ул вос аёгыт, маньтагыл хохса ул вос хартэгыт, пуссын ты тэлат урыл тот

потыртаве.

Ты коныпал нёврамыт ёт полицият, МЧС мат ос лёккарыт акваг-хонтхатыглэгыт. Тан ос савсыр касылыт, хаништапыт вэрыглэгыт. Культурат рўпитан махумн ёнгилтапыл щёпитавет, аквёет кас вэрёгыт.

Тувыл тамле пумыщ олупсал олнэныл юи-палт савнуv агиришит-пыгришит латың хўнтлуңкве патэгыт. Молты тал нёлолов этпос сыс акв сотыра 301 лўль вёрмалит нёврамыт вэрысyt. Ос ты тал акв сотыра 217 лўль вёрмалит ёмталасыт.

Латың ат хўнтлан нёврамыт ёмас номтың вёрмалит вэруңкве мот маньлат хотпатн ос нётавет. Тан тўи ўшлахтын ман аквёет ялэгыт, ўсхулыт махум ёмнэ лех тара мұсхалыг минуңкве хаништавет. Машинат ялнэ лёңхытыт мори ул вос хайтэгыт. Ты урыл Урайныл ёхталам аквхуйплов классыт хаништахтын пыг Георгий Чебыкин



Ишхыпшыт уытгымжурт

потыртас.

Тувыл ляххалыт тотнэ хотпат танки рўпатаныл овылтыт потыртасыт. Ольга Лазарева, «Югра» телерадиокомпаният рўпитан нё, мань кинал щёпитан урыл латың тотыс. Михаил Осипов «Новости Югры», нампа газетат кұщай ваңын хум, ляххалыт хумус эрнэг хансуңкве эрёгыт, таи хўлтыс.

Нёврамыт ёт ос тан щаняныл-ащаныл ёт матыр лўль вёрмалит ёмталанёныл порат, тан мак наманыл хансуңкве ат рёви. Тувыл олнэ ұсаныл манос павланыл хўлтуңкве ос ат эрёгыт. Латың ат хўнтлын нёврамыт янмалтан щёмьят руш щирыл «неблагополучный» лававет. Тамле латың товатытн ат мұсты, та щирыл хўлтыглахтуңкве тан ат касашёгыт.

Ман ань тананыл «лўль вёрмалитн ликмын щёмьяг» лавуңкве патсанў.

Тувыл ань пилыщмаң вёрмалиг таи олы, сав агиришит-пыгришит Интернет нупыл сака хоса сунсым ўнлантэгыт. Маныр ляххалыт ловиньтэгыт, маныр кинал сунсёгыт ос хотьютаныл ёт тот вайхатым олэгыт, товнакт щань-ащанылн тан щар ат уральтавет. Тот сав лўль пишитн хаништаңкве вёрмавет. Юи-овыл талытыт това нёврам танкинаныл нёхсаватыяныл, карс колытныл ёл порыгмёгыт.

Тамле тэлат ул вос ёмталэгыт, нан такем ёмас вёрмал вэрён, нанки нёвраманын мощ уральтым оныщён. Ватихал тан ётаныл потыртэн, тёланыл урыл пумшалахтэн.

Тамара МЕРОВА

КҮЩАИТ РҮПАТАНЫЛ

Танки латһаныл тув кетуҥке вёрмёгыт

Ханты-Мансийск үст ляххал тотнэ махум общественный связь департаментыт акван-атыглавёсыт. Тот рүпитан махум «Социально-ориентированные услуги» наппа проект урыл потыртасыт.

Өвлэт департаментыт рүпитан манылат хум Яков Самохваловты вёрмалы урыл латын лавыс. Ман округут ань хурум сөтыра савсыр некоммерческий организацият рүпитэгыт. Тан халанылт кит

сөтыра организация мирн нётэгыт, ост ты рүпата вёрим олн ат сэлэгыт. Тан танки нэпаканыл ты департаментын кетуҥке вёрмёгытос рүпатаныл магсыл олн виҥке. Тувыл тамле олн магсыл туп аквта махум нэпаканыл кётыглэгыт, мотаныт пөхыт хулытэгыт. Ань округут олнэ мир китыглавет, манхурип тэла магсыл ты организациян олн тастуҥке. Касын элумхолас такви латһе ищхипын ут щирыл

тыг www.crowdugra.ru кетуҥке вёрми.

«Открытый регион» наппа центрыт күщайг рүпитан нэ Оксана Макеева лавыс: «Касын элумхолас такви латһанэ сүкыр этпос 30 хөталэ мус ман палтув вос кёты. Ман тав номтанэ ёмашакве тах ловиньтыянүв. Тамле рүпата вёрим ман сав эрнэ тэла тах вёрёв».

Людмила ТЕТКИНА

Ханты-Мансийск үст улыпат үнттувёсыт



Ты этпос 17 хөталэт Ханты-Мансийск үст «Ульпа хөтал» олыс, үст олнэ мир щёмыян тагыл тув ёхталасыт. Тамле ялпын хөтал касын тал сүкыр этпост вөр үргалан хөтпат янытлан кастыл вёрыглаве.

«Ульпа хөтал» не-сырьевой сектор экономики департаментыт, үс мирколт рүпитан хөтпат щёпитасыт. Уст олнэ мир Дунин-Горкавич үсхулыт акван-атыглавёсыт.

Няврамыт магсыл савсыр суссылтапыт, ханищтапыт рүпитасыт. Агирищит-пыгрищит катыл хурип пөсласыт ос энтапыт сагуҥке, рактыл пөщгуҥке ханищтахатыт. Ос савсыр ёнгитыл ёнгылтавёсыт. Ханты-Мансийск

үст миркол күщай нэ Татьяна Волгунова, Ханты-Мансийский район күщай хум Пётр Захаров ос ма-вит үргалан департамент күщай хум Евгений Платонов махум ялпын хөталыл янытласаныл. Евгений Платонов лавыс, тан улыпат үнттуҥке махум касын тал вөвиньталыяныл. Овлэт тамле вёрмалы туп Ханты-Мансийск үст вёрыглавес, ань округ янытыл олнэ мир улыпат үнттуҥке

акван-атыглэгыт. Тамле тэла таи магсыл тан щёпиталэгыт, тыт олнэ мир вөр үргалым вос оныщёгыт, порс вөрт ул вос пахвтэгыт ос ма-витув ул вос паҥктэгыт. Та хөтпа хотьют йив такви үнтты, наскассыг йивыт сагруҥке ос нэматыр люль вёруҥке ат паты.

Ты юи-палт махум янытлаҥке мирн ванэ ханты эква Мария Кузьминична Волдина вөввес. Тав махум ёт щань латһыл пащалахтас. Ханты эква потыртас, хумус соссаң махум ты йив янытлэгыт. Пёс щирыл ульпа Төрүм пыгыг олыс, ты магсыл ханты махум таве ялпын йивыл ловиньтыяныл.

Ос лавыс, соссаң махум касын йив янытлэгытос үргалэгыт, тан нас тох тэла тал йиват сагрёгыт. Лямийв, ульпа, наҥк, тарыг ос сав мөт йивыт урыл ханты махум савсыр мөйтыт, амщит оныщёгыт. Няврамыт пёс потрыт, мөйтыт, амщит потырым тан ма-витув янытлаҥке ханищтэгыт. Тамле мутраң махум пёс порат тагыл ты мат олэгыт.

Округ губернатор Наталья Комарова ұлпат үнттуҥке ос ёхталас. Овлэт күщай нэ суссылтапыт сунсыс ос тувыл махум ёт улыпат үнттыс.

Людмила
АЛГАДЬЕВА

Савсыр Төрүмн агтнэ мир мирколт атхатыгласыт

Аньмүнтнув округ мирколт
Апёрна пиннэ хөтпат ос ислам
щирыл Төрүмн агтнэ махум Ханты-
Мансийск үст акван-хөнтхатыгласыт.
Тот «Православие и ислам в Югре:
диалог во имя мира и согласия» намба
сапрәни вәрыглавес. Ты вәрмалит
урыл потрамаңкве округ янытыл үсыт
ос районыт өлнэ тәнки Төрүманылн
агтнэ хөтпат акван-атыглавёсыт. Ты
махум пуссын халанылт ишхипың ут
хосыт потыртасыт.

Акван-атхатыглам хөтпат элы-пәлт өвләт Илья Верховский потыртас. Тав ЮГУ колт «Югра-Социум» намба ханищтан центрыт кұшаиг олы. Пёрна пиннэ ос ислам щирыл Төрүмн агтнэ мирыг хосат тагыл Югра мавн өлмыгтасыт.

Акв ляпан тыт өлмыгтаманыл пәсыл тән юртыңыщ өлэгыт, тәланыл акван-нётхатым вәрияныл. Матыр лүль тәлат төвнакт ул кос ёмталэгыт, ос тән акван-потыртахтым, аквёет ёр пиным пөхан ләквтыяныл. Касың

элумхөлас ёмас посың номтыл элаль вос олы, такви ляпат өлнэ хөтпат нупыл сымыңыщ вос сунсы. Төнт ущ сав мирыт тәнки халанылт акваг юртыңыщ ос сөтыңыщ олункве патэгыт.

Тувыл мүй махум магыс Ханты-Мансийский ос Сургутский митрополит Павел ащойка кетум паща ләтҗе Ханты-Мансийск үст өлнэ протоиерей Сергей Кравцов ловиньтастә. Тав ләвнәтә щирыл, мән өлнэ мав таимәгыс тагыг ос ёрыг олы - тыт сав нотпа өлум махум тәнки Төрүмн

агтым сав тәлыт өлсыт, нәмхуньт нәмхотты хөтпа ат люкамтәлсыт. Туп хотьют Төрүманылн ат агты, тав мори кәпырты, такви олупсатэ витыг тотытә ос мөт махумн пёрхаты. Тувыл тыи ты пилищмаң - тамле хөтпат пәттыиг махум халмалтахтэгыт ос хөнтлан вәрмалит ёмталэгыт.

Ислам щирыл Төрүмн агтнэ махум палт Муфтий кұшай Тагир Хазрат Саматов мирыт пуссын Курбанбайрам ялпың хөталыл янытласанә, пүстәгыл өлнә паща ләтың махманән кетыс. Осты форум вәрнә хөтпатн пүмашипа ләтың ләвыс. Тамле акван-потыртахтын нак округт внутренний политика департамент, Ханты-Мансийский митрополия ос Юграт мусульманыт акван-атхатнә колытытн вәрвес.

Касың үсныл ос районныл ишхипың

ут хосыт мүй хөтпат потыртасыт. Тән ләтҗаныл пуссын акв ёмас номтын хөёгыт. Тәнки Төрүманылн агтнэ махум тох ләвыгла-сыт, тән олупсанылт нәмхотты Най-Отыраныл ләкква-уртуңкве шар ат эри.

Ос хотьютаныл ма янытыл кұшайлахтын магыс ёр кинсы, тамле номтыт ёл вос пөилтыяныл. Тән Төрүманыл аквкөмыл өлэгыт, аквкөмыл үргалавет. Мүтраң номт элаль пинуңкве ке, тән Төрүмн нётнә Най-Отыраныл наманыл мұсхалыг ханищтавет ке, насати, тән алаты аквхурип намыл хұлтавет. Таимәгыс тән тәнки халанылт қаңкыг манос апшииг ләвхатуңкве вөрмөгыт.

Сав нотпа тәлыт тән пёс махманыл посың номтыл элаль өлсыт, ань аквтох элаль вос өлнувыт. Таимәгыс ань махумпалт өлыглантәрвит ос пилищмаң тәлат акван-потыртахтым пөхан ләквтуңкве патыяныл. Лүль пищит өшнә хөтпат Төрүмн хунь агтэгыт, ёмас номтыл өлэгыт. Тувыл мөт хәштал агт тотнә махум палт ул вос ликмысыт. Тәнанылн ань нётуңкве эри, лүль пищаныл хот вос ёрувляяныл.

Ты номтыл ань акван-атхатыглам хөтпат ты элаль олункве патэгыт, ёмас тәлаг ёмтнә мус тән элаль аквёет тах вәрияныл.



Сургут үс

В.Узельварум хури



Казань үс

Ишхипыңуыт вим хури

Тамара
МЕРОВА

КАСНЭ ВАРМАЛЬ

Вөр ёл-яктын махум кассыт



Каснэ махум



Няхщамволь павыл хум

Л. Спирякова варумхуриг

Вөрың мат ййв ёл-яктын махум янытлан хөталаныл варим пасыл ты тал атпан талыг ты ёмтыс. Ань ёлнэ мав янытыл тән магсыланыл савсыр касылыт, ялпың хөталыт ос суссылтапыт варавет.

Ханты-Мансийск үст округ янытыл шар мак ёмашакв рүпитан лесничиит, вөр ёл-яктын махум акван-атыглавёсыт. Ань үсн ёхталам аквхуйплов хөтпа танти халанылт кассыт. Савыңпалэ тән халанылт пуссын маньлат хумквет олсыт. Ты касыл элы-палт тән мань нанкрищит ос хальйивыт мән үнттысаныл.

Өвлэт кұшаит тананыл янытласаныл, ёмас латңыл лавсаныл. Тувыл касыл уш та ыовитавес. Касың хөтпа таквиавес. Сартнэ төре ёмашакв уральтастэ, ёмашакв

рүпиты ман ати. Тувыл акв хөтпал янас кассыт, аквторыг тананылн касуңкв ат рөвыс.

Тән ййвыт ёл-сартсаныл, тувыл ййв товыт пуссын хотьютаныл моляхнув сартыянэ, та щирыл кассыт. Юи-өвылт лаввёсыт, хотьютаныл ййв-охса шар вөвтаг сартытэ. Тән пуссын хұрум сантиметраг сартсаныл.

Каснэныл халт тит-тувёсыт. Ляпан полевой кухняг лавнэ яныг пұт-капай хартвес, тот тәнотыл та пайтвёсыт. Кон мощ ащирма вөтыг олсы, махум ул вос пөльвёсыт, исум щайл

пиныглавёсыт.

Ты касыл руш латңыл тох лаввес «Лучший лесоруб Югры». Тыг ёхталам хум хөтпат, соль, сака ёмашакв рүпитэгыт. Акв касыланыйл тамле олсы, яныгман ййв ёл-яктыма юи-палт пөстым мән вос паты. Элыннув тит ййв-өвлыг тұштувёсыг, халэнт – акв метра. Ййв сартаве, тав та халн ёл вос паты. Каснэ махум пуссын ёрнэ мән ййв ёл-паттысаныл.

Та юи-палт пуссын кол тиврын вөввёсыт, тот янытлаңкв та патвёсыт. Округв янытыл ул касың районный лесник-махум ёхталасыт. Хальус район Няхщамволь павылный ёхталам тит хум хөтпаг сас янытлавёсыг. Александр Николаевич Выгузов ма-вит ўргалан округ департамент палыл янытлан нёпакыл майвес. Ос Сергей Павлович Загудаев магылн тагатаң «Почётный работник лесного хозяйства» наппа пөсыл майвес.

Советский, Октябрьский ос Кондинский районьтт рүпитан махум ос янытлавёсыт, сав ёмас латңыл лаввёсыт. Ушты рүпитаңкв ыовылтахтам тит хум

хөтпаг Андрей Чертов ос Валерий Кузнецов присяга-латың лавсыг, рүпататән ёмашакв варуңкв лавхатсыг.

Евгений Платонов ма-вит ўргалан департаментыт кұшаиг олсы, тав вөр ўргалан рүпата ёмашакв вэгтэ. Вөр яктын махум янытламанэ порат тав тох лавыс, округувт лов сөтыра арыгтем хөтпа ты рүпата вәри. Мән округув ты хосыт сав олн сәлы.

Вөрүв товлыңхәпыл яласан махум нумыл ос уральтыяныл. Ты этпост Россия янытыл Москва ўс ляпат яныг касыл олсы, тув мән округувныйл парашютист-пожарный хум ялыс, тот касыс. Тав Россия янытыл ёхталам махум халт титыт мёста вис. Тав наме Андрей Зуев, тав ань сака янытлаве.

Ты олум касыл Дмитрий Меликов «Лучший лесоруб Югры» яныг намыл майвес, тав ань ыовылместавистэ. Титыт мёстал Николай Фирсов майвес, ос хұрмит – Артем Смирнов. Тән ань пуссын мүйлупсал майвёсыт, ёмашакв янытлавёсыт. Мөтыт тал ты касыл ос тах вәраве.

Валентина ХОЗУМОВА



Ййв вөвтаг сартаве

НЯВРАМЫТ МАҢЫС

Самын патум мәнанылт ёмас үщлахтасыт

**Кондинский район Шугур павылныл кит
нэг ляххал мәнавн кетсыт. Тыи Светлана
Попова ос Инна Бринстер, тән сас школат
рүпитэг ос туи няврамыт ёмцакв үщлахтан
маҕыс сыресыр ханищтапыт ос кас вәрэг.
Тот «Няврамыт павыл» намба үщлахтын ос
пусмалтахтын кол талэ-туве рүпиты. Ань ты
өвылтыт тән потыр ты хассыт.**

«Шугурт өлнэ аҕиришитн-пыгришитн «Няврамыт павыл» колт матыр-ати вәруңкве сака мұсты. Тән ты мүйлын мәнаныл сака эруптыяныл. Тот няврамыт тәнки өщнэ хәснутаныл элаль ханищтаңкве нөтавет, тәнки номтың тәланыл өс элаль тотыяныл. Тувыл аҕит ос пыгыт хөнтаң мәнәщи мир пәс өлүпса урыл савсыр накыт тәра-паттэгыт. Та пәс махманув хумус сөтыңыг, номтыңыг өлсыт, маныр вәрыгласыт, ань аквта ерт өлнэ мөт мирыт тән щиранылт өлуңкве өс ханищтавет.

Мән тәнанылн сыресыр ханищтапыл щөпитасанүв ос янас

тумп щирыл (рущ щирыл ке лавуңкве «Островок») ләкквартсанүв. Тыи «Пәс потрыт ос мөйтыт», «Мәщтырлан махум», «Мә-вит түйтыглан утанэ», «Номтыл тахнэ вәрмалит», «Ёнгилыт ос кас». Тамле нам ты өныщөгыт ос тот савсыр тәлан ханищтавет, вөр халт хайтыгтым, сыстам лылыөп атаим – няврамаквет пусмалтахтэгыт.

Лүимә махум өвылтыт таи лавуңкве эри, тән мә-витаныл сака эруптыяныл. Йис тагыл маныр, хөт ос хумус өлыглы – пуссын ты накыт пәс махманув тәрапыттым өныщияныл. Тувыл махманув мә-вит

сыресыр суссылтапанэ палт ханьщувлым, тәнаныл тәнки өлүпсанылн әрталым, тув рөвлахтым элаль та өлөгыт.

Мән ань няврамаквет аквта щирыл номтыңыщ өлуңкве ханищтыянүв. «Няврамыт павыл» намба колув сыстам тарыгйивыт яныгман мәт ос түр ляпат өлы. Тұрын Тантуля паты, ос та ляпат пилыт, ләхсыт яныгмөгыт. Ты вөр халт мән кол үнттысүв, кит колнакыт няврамыт хүлэгыт, акв колнакт үщлахтэгыт ос ханищтахтэгыт, мөт колнакыт өнгөгыт ос тәпъялэгыт. Яныг верандат палаткат, турист пормасыт акванатвөсыт, турап порат тот өнгөв. Ань ты туи сыс вәт аҕиришит-пыгришит вөрт өлнэ павылквет үщлахтасыт. Төва няврамыт палаткат өлсыт.

Тот өлнэв сыс мән мә-витув сыстамтылүв, я вәтат ос вөрт өлнэ хара

мәт йивсакыт, порс хотатыянүв. Хөсвой колыт пусастыянүв, намыл хансыянүв ос номерыл пиныянүв.

Лүимә соссаң махум өнгилыл өнгөв, тән касыланыл тәрапаттыянүв, тувыл ос халувт касөв. Ханты ос мәнәщи махум йикваныл, эрганыл ханищтыянүв ос мүй хөтпатн суссылтыянүв. Эргынәныл кастыл няврамыт мощ ләтың ханищтэгыт.

Тувыл аҕиришитн-пыгришитн катыл вәрнэ пормасыт вәруңкве сака мұсты. Мән тыт сортхүл совныл мәнә пормасыт юнтуңкве ос товлың үй пунытыл хурит щөпитаңкве тәнаныл ханищтыянүв. Катыл вәрим пормасаныл савсыр касылын кетяяныл ос тот тән эсавет.

Этипалаг няврамыт яныг аращ вәтан акванатхатэгыт ос яныг хөтпат тәнынылн пәс потрыт, мөйтыт мөйтэгыт. Тән акв ляпан акван-үнтым, асталыг ос төвнакт туп лөмвой суй хүнтамлым пәс йис мөйтыт пұмщалым хүнтлэгыт.

Та сыс аращ атың хұлың исмит пайтаве, хұл пұт пөтаве ос няврамыт атың исмит тэгыт. Тувыл пыгришит тәнки пувум хұланыл пайтэгыт ке, тонт тасавит щәгт тәнанылн. Аҕиришит ос хұл совныл нөтнэ пормасыт вәрөгыт. Ты сака ёмас үщлахтын пора!

**Потыр мәнәщи ләтңын
Тамара МЕРОВАН
хасвөс**



«Няврамыт павыл» намба үщлахтын мә

Таёжный павылт ӧлнэ нэ

Ты тал лүпта этпос Югорск үст пӧхат нӧврамыт ўшлахтын мат «Таёжные знания коренной Югры» намба ханищтап ӧлыс. Советский ос Хальӧс районыгт, Ханты-Мансийск ос Сургут ӧсыгт ӧлнэ мӧныцит тот акван-атхатыгласыт.

Хум хӧтпат нӧврамыт ўшлахтын мат сумъях ўнттысыт ос ёрнкол тўштысыт. Нэ хӧтпат ос сӧсныл сӧвсыр хусапыт вӧрсыт, мӧныщи супыт ос яныг хасап ӧнтсыт. Ты ханищтап рўпитан порат тот ам акв нэ ёт вӧйхатасум, тав таме Елена Хаматнурова. Тав омаӧт Евдокия Дунаева мӧныщи нэ ӧлыс, ӧтятэ Хайдарян Хужахметов башкир хӧтпа.

Елена Советский район Таёжный павылт ӧлы. Тав лӧвыс, тав ӧвыл щес тамле ханищтапын ёхталас. Тамле тӧла тавен сака мўстыс. Елена лӧвыс: «Ханты-Мансийск үст округ Думат рўпитан мӧныщи нэ Оксана Рыжкова ты вӧрмалы урыл ӧнум потыртас ос мӧщтырлаңкве ханищтахтўңкве тыг вӧвыстэ.

Анӧ телевизор хосыт вӧтихал суссылтаве, ос газетат хансыглаве – тамле ханищтапыт ос ялпың хӧталыт округ янытыл соссаң мӧхум мӧгсыл акваг вӧрыглавет. Мӧн ӧлнэ мӧвт тамле тӧла ӧвыл щес ӧлыс, тьи мӧгсыл тамле ханищтапын ялуңкве тӧра кӧсашасум.

Ам Советский район Таёжный павылтсамын патсум, тот яныгмасум. Школан миннэ порам хунӧ ёхтыс, Советский ӧсн кетвесум, тот ин-тернатыт ӧлсум. Нё-

лолов класс мус тот ханищтахтасум, тувыл Ивдель ӧс школа ӧстлаңкве кетвесум. Ты юи-пӧлт акв тал та үст маснут ӧнтнэ нэ ханищтахтасум ос тувыл яныгмам пӧвлумн ювле ёхтысум.

Акв тал маснут ӧнтнэ нэ рўпитасум. Тувыл омам ӧгмыл ёмтыс, пўльничан пинвес. Лёк-карнлӧввесум, омав шар ёртӧл хулытыс, ӧгме сака тарвитың, пўсмалтаңкве ат вӧрмаве. Тӧнт омам ӧнум лӧвыс, ӧтям Башкирия мат ӧлы, пищ-малвос хансылум остыг вос вӧвинӧтӧлылум, тав ётэ вӧщинтахтўңкве вос ёхталы.

Щӧнягум-ӧщагум киттыг-минасыг, хунӧ ам иң мӧнӧ нӧврамыг ӧлсум, тьи мӧгсыл ӧтям аты вӧщинӧтаслум. Омам хунӧ ӧгмыл ёмтыс, ам 20 тӧлум тӧвлыс. Ӗтям пища хунӧ лӧвинӧтастэ, тӧра ёхтыс. Омам таве кӧсаластэ, улпыл, сымёт ёмас ёмтыс, ӧлӧль ӧлуңкве ёр хӧнтыс, пусмалтахтас.

Ты юи-пӧлт ӧтям Башкирия мёнамён ӧлуңкве вӧвсаге. Мӧн пуссын аквёӧт тув минасуӧв. Тот ам сӧсныл сувенирыт вӧруңкве ханищтахтасум, тувыл ремёсла центрыт рўпитасум. Та мат ӧлнэ мӧхум ос пёс йис тӧгыл сӧсныл сӧвсыр хусапыт, ӧнысупыт вӧрсыт. Анӧ ты мус мӧн павылквет



О. Рыжкова вӧрум-хури

ӧлнэ мӧхум тамле утыг сӧвсыр тӧнут ӧныщегыт.

Башкирия мат сӧсныл сӧвсыр пормасыт мӧщ мӧт щирыл вӧрияныл. Сӧсныл сӧвсыр нётнэ ӧныт, сувенирыт вӧруңкве ӧнумн мўстыс, рўпатам сака ӧруп-таслум.

Та мат лов тал ӧлсӧв. Тувыл пуссын аквёӧт ювле Таёжный павылн ӧлуңкве ёхтысӧв. Ома-гум-ӧтягум павылт кол ўнттысыг, тувыл вӧраим ос хўл ӧлыщ-лым акваг яласасыг. Ты тал мӧнӧполь ӧтпост омам ӧтимыг ёмтыс, ӧтам таккет хулытыс.

Тыг ювле ёхтумув порат ам павылт лап-кат тӧнут тыналам рўпитасум. Анӧ Толя мӧнӧ пыгум ёт юн ӧлӧгум. Павылт рўпата шар ӧтим. Ты ӧлы-пӧлт Таёжный павылт леспромхоз ӧлыс, павлың мир пуссын тот рўпитас,

тувыл организация лап-пантвес, мӧхманув рўпата тал та хулытсыт.

Ты ханищтапыт ам нэкет ёт мӧныщи супыт ос хасап ӧнтсум. Ты ӧлы-пӧлт тамле маснут ам ат ӧнтыгласум. Ам мӧниг хунӧ ӧлсум, мӧн ётув анёквӧв ӧлыс. Таве ам ёмашакве номилум, мӧныщи супыт ос сӧвмӧт маснут ӧнтўңкве тав са-ка хӧсыс.

Анёквӧм пӧхыт ӧлым, ам мӧныщи лӧтың ёмашакве ханищтаслум. Ляпа рўтанум пуссын мӧныщи лӧтӧыл потыртаңкве хӧсегыт. Тьи мӧгсыл щӧн лӧтың ат ёрувлылум.

Оля ӧквум щёмьятэ ёт Таёжный павылт ӧлы. Соня ос Марина ӧквагум вӧрт ӧлӧг, павылн вӧнтлуңкве шар ат кӧсашег».

Людмила
ТЕТКИНА

НЯВРАМЫТ МӐГЫС

Омагум-ӓтягум янытлыягум!



Тамара, Вика, Саша ос Эльвира



Людӓ ос Саша

Паша ӓлӓн, «Лӓимӓ сӓрипос» газетат рӓпитан тының махмыт!

Ам Александра Хозумова, Кульпас пӓвылт хӓтыт классыт хаништахтӓгум, китхуйплов тӓлум тӓвлыс. Омагум-ӓтягум Лӓпмус пӓвылт ӓлӓг. Тот хорамың вӓрың ма, пӓвылтӓв сака нӓтнӓ. Тыт Кульпаст, хунь хаништахтӓв, ам увциягум ӓт интернатыт ӓлӓгум. Туи Лӓпмус пӓвылт мӓн вӓрн ялантӓв, пил вӓтӓв, лӓхыс атӓв. Ыйхул ӓныщӓв: мисыт, лувыт. Омам ос ӓтям ӓт пум сӓгрӓв, толгӓв. Тӓнатӓн аквписыг нӓтӓв. Мӓн щӓмьяв яныг, сӓт хӓтпа.

Ам ань омагум-ӓтягум урыл Ахансуңкве таңхӓгум. ӓтям наме Александр Владимирович Хозумов. 1961тӓл лӓпта ӓтпос сӓтхуйпловит хӓталӓт самын патыс. Опам Пупысум пӓвылныл ӓлыс, Владимир Устинович Хозумов. Щӓщӓквӓм Елена Константиновна, ӓги ӓпарищ наме Юрӓева, Сума пӓвылныл ӓлыс. Хунь тӓн яныгмасыт, Лӓпмус пӓвылт ӓлсыт.

ӓтям щӓмьянылт сӓв нӓв-Арам ӓлыс. Тӓн оманыл ос ӓтяныл сака ӓмас хӓтпаг ӓлсыг. Нӓвраманӓн ӓмашакв янмалтасанӓн, аквписыг рӓпитасыт – мис, лув ӓщсыт, пум

сӓгрысыт, нӓйив щӓпитасыт. ӓтям нила каңк ӓныщи ос акв ӓщ. Щӓр яныг Валера, Щерки, Леонид, Ынтари ос Татьяна. Ам ӓтям сака мащтырыг ӓса вӓри, тувыл мӓн хӓпыт, йивхӓпыт, тӓпыт. Хул алышлаңкве, вӓрт яласаңкве ӓс тав сака мащтыр хум. Хулпыт ӓс такви вӓри. Махум мӓт пӓвылныл тавӓн ӓса вӓрылтӓгыт, мӓнхӓпыт, хулпыт, тав пуссын вӓри. Мӓнавн аквписыг сӓвсыр пӓс потрыт потырты, мӓйтыт мӓйты. Мӓн хунь каникулын юв ӓхтӓв, таве хунтлуңкве мӓнавн сака пӓмыш. Пӓс мӓйтыт, потрыт мӓн сака пӓмшалӓв. Сака пилыщмаң потрыт хунтлуңкв ӓс кӓсӓщӓв.

Тав пӓс йиквыт ӓс ваг. Хунь пӓвлыт сӓвсыр ошхулит, тӓлыглапыт, тувыл сӓвсыр семинарыт вӓравет, тав тот ӓс акваг йикви, ӓрги, ӓнги. Тав сака ӓмас ӓтя. Мӓн таве ӓруптылӓв, янытлылӓв. Тав мӓн ӓтув мӓныщи лӓтңыл акваг потырты. Таимӓгыс мӓн мӓнти лӓтңув торгамтылӓв.

Ятил, тының ӓтям, ам наңын сака ӓруптылум, ӓмас лӓтың, сымың лӓтың наңын кӓтӓгум! Пустӓгыл хоса ӓлӓн, наң мӓнавн сака ӓрӓгын!

Ань ос омам урыл хансӓгум. Омам Тамара Алексеевна Хозумова. Тав ӓс Лӓпмус пӓвылт

мӓн тӓгыл ӓлы. Тав намхӓталӓ 1972 тӓл вӓртур ӓтпос сӓтыт хӓталӓ. Анӓквӓм-ащӓйкам ӓстыт Лӓпмус пӓвылт ӓлсыг. Ащӓйкам Алексей Михайлович Хозумов. Тав щӓрщ вӓтат армият лусытас, яныг катерыл яласас.

Анӓквӓм наме Анастасия Даниловна. Омам щӓмьятӓ яныг ӓлыс. Тав нила увци ос нила каңк ӓныщис – Михаил, Лӓня, Валера, Юра, Матрӓна, Лӓлюк, Исвета, Марина. Матрӓна увцитӓ Хӓльӓс пӓльницат мӓн лӓккарыг рӓпиты. Тав хунь отпускат ӓлы, Лӓпмусн аквписыг ӓхталы. Мӓн таве ӓруптылӓв ос янытлылӓв. Марина ӓще Саранпӓвылт ӓлы. Ойкатӓ ӓт сӓлы ӓрим Нӓрт яласы.

Омам мӓныщи супыт юнты, пальсакыт харты, сӓтапыл сӓвсыр пормасыт вӓри, пӓркат юнтуңкве хӓсы. Мӓн таве ӓс сака ӓруптылӓв, ӓмас сымың лӓтың кӓтӓв. Тӓн ӓтям ӓт сака ӓмас ӓлӓг, халӓнт мӓныщи лӓтңыл потыртӓг.

Тының омам ос ӓтям, хоса ӓлӓн, сӓтыңыщ, шуниңыщ ӓлӓн. Пус кат, пус лагыл, Тӓрум ӓт, Отыр ӓт ӓлӓн!

Саша ХОЗУМОВА,
Кульпас пӓвыл

Мәщтырлан соссаң мәхманув

Марина Викторовна Самсонова Сургут үст җы, тав аҗи опарищ наме Кугина, Тагт павылт яныгмас. Ань соссаң мир пёс пормасыт юнтнэ ос мәщтырлан колт кўщаит рўпиты. Музей-коланыл ўнлын мәтэ руц ләтңыл тох ләваве – «Старый Сургут». Тот савсыр колыт ўнттымат, кәсың колт матыр янас пўмаш суссылтаве.

Рўпататэ урыл Марина Викторовна тох потыртас. 2000 тәлт рўпитаңкв тув ёхтыс, хөтхуйплов тәл тот рўпиты. Ань тән хөт соссаң хөтпа аквёет рўпитёгыт, ат хөтпа мәщтырыг өлэгыт ос акв методист хөтпа.

Матах тәл ми́нам порат тән кўщаитн ләввёсыт, соссаң мир ялпың хөталыт музей ўнлын мәт нөх вос

ялтуптыяныл, ялпың хөталыт янытлан мәгыс үст өлнэ мәньщи, ханты ос ёрн мир тән палтаныл акваг вос ёхталэгыт. Тувыл мәхманув рўпитаңкв та өвылтахтасыт, кәсың тәл туя порат «Ўринёква хөтал» янытлаңкв патсыт. Тув порат ос мәньхәпыл каснэ хөтал акваг вәрыглэгыт. Ань юи-өвыл хўрмит тәл Этнос яныгман порат



М.А. Самсонова

«Тылащ поры» на́мпа пўрлахтын кан вәрёгыт.

Үст өлнэ мәхум ты ялпың хөталыт өлнэ порат тув акваг ёхта-лэгыт, соссаң хөтпат тәнүт ёт-тотэгыт. Сытамнув мәт моц пўрлахтэгыт. Мәщтыр хөтпа ос такви юнтум пормасанэ тув ёт-то-тыяне. Пасаныл, ўласыл миве, тот ўнттавет, тот та тыналахтэгыт. Тох тәнти мәгсыланыл моц о́лн-ло́мт сәлэгыт.

Мәнь таквс этпос ос рўтыг өлнэ финно-угорский мирыт яныт-лавет, тән ты тәл ты ялпың хөтал ос тах вә-рёгыт, акваг тах ос а-хатэгыт. Тот мәньщи, ханты ос ёрн мәхум пёс олупса, пёс вәрмалит, пёс накыт урыл потыр-таңкв патэгыт.

Ань сәв мир тән палтаныл ёхталы, нывраманыл, апганыл ёт-вөвияныл. Мәхум тәнти нас мўйлуңкв ос ат таңхёгыт, матыр вәруңкв ман касуңкв ань сака кәсәцёгыт. Мәньхәпыл каснэ вәр-

маль порат сәв хөтпа тув хасхаты, кәсыңе касуңкв таңхи. Ювле хультум тәл хөтпанахтем хөтпа касыс. Ты э́лы-пәлт туп хусахтем хөтпа тәнти халанылт кассыт.

Ань мәньлат соссаң ныврамыт сака ат э́ссамтэгыт, касуңкв ос сака таңхёгыт. Ты касыланыл музей ляпат овнэ Сайма на́мпа я вәтат вәрыглаве. Ты я пәхвың, а́ти сака ми-лың.

Музей-колт рўпитан мәхманув школатт ха-нищтахтын ныврамыт ёт рўпитаңкв ос ләввёсыт. Сәт сыс тит щёс тән палтаныл ныврамыт ёх-талэгыт. Тит группаг урттым өлэгыт, кәсыңет титхуйплов ныврам. Сәвнув ныврам виңкв ат рөви. Коланыл а́ти сака яныг, пуссын ат лә-пёгыт.

Ты ныврамыт мәгыс тән сәвсыр пўмаш вәрёгыт. Акв хөтал тән сәвсыр мўйтыл мўйтавет, мўтыт хөтал ос өлнэ мәв урыл потыртавет.



Музейт тўлыглап суссылтаве



Рүпитан коланыл

Юнхатнэ нэ

Юлия Антоновна Казанжи Нижневартковский район Аган павылт олы, ремесла центр колт рүпиты. Тав мащтырланкве сака хасы, кос маснут, кос мот матыр пормас пуссын юнты.



Ю.А. Казанжи

Това нйврамыт ма-
гыс ос савсыр ханишта-
пыт вэрыглавет. Хотьют
матыр юнтуңкв ман
мащтырланкв те таңхи,
тавён оln ойтуңкв эри.

Тан классыл тув ёх-
талэгыт, соссаң мир пёс
олупса урыл потырта-
вет, хотьютаныл мань-
щи ман ханты супыл,
мольшаңыл ман нуй
сахил пёслахтуңкв те
касащи, тав та пёслах-
ты, ос туп тав оln вос
ойты. Ань рущит ман
мот хотпат тох пёслах-
туңкв сака таңхегыт.

Ты элы-пал талыт
тув ёхталан муйлын
махум щайл айтвё-
сыт, хул исмитыл пай-
тыглавёсыт. Ань махум
тыттуңкв ат рови, ма-
тыр ул вос ёмты.

Тал вос ёмты. Ёст
савсыр ялпың хоталыт
олыглэгыт. Касың туи
«Соцветие» намп
фестиваль вэраве, тув
савсыр мирыт атха-
тыглэгыт. Касың мир
такви ййкванэ суссыл-
ты, эрганыл эргияныл.
Танти тэнутаныл пай-
тияныл, касачан хотпат
пуссын та тыттияныл.
Музейт рүпитан сос-
саң махманув тув ос
воыглавет, тан ос ма-
ныр хасэгыт, маныр
вёрмёгыт, пуссын тот та
суссылтияныл.

Ёст оlnэ соссаң

нйв-рамыт ййквуңкв
ос эргуңкв хаништан
магыс тананыл акван-
атсаныл. Товат «Луимэ
ханса» коллективн
ялантэгыт, тан ань
ййквуңкв сака ёмашакв
хаништахтасыт. Мот
коллективаныл ос тох
лававе – «Ас нэ». Тот
нэквет эргыт эргёгыт,
ййквёгыт. Ань тан вэ-
вет. Хот матыр ялпың
хотал те вэраве, тув та
вовавет.

Марина Викторовна
тох лавыс, ты йист рү-
питаңкв тарвитыңыг
ёмтыс, ань касың хотпа
янас план-нэпакыл
хансаве, акв этпос сыс
маныр рүпата тавён
варуңкв эри. Ты нэпак
щирыл тав вос рүпиты.
Маштырлан магыс
тёрыл, нуйил, сётапыл
пуссын мивет. Пормас
хунь юнтаве, тав руш
мань лапкан тотаве,
тот тыналаве. Тувыл
варум рүпатаныл урыл
отчёт-нэпак хансуңкв
эри, хотпа этпос сыс
рүпататэ вэрыстэ ман
ати.

Ты маньщи кущай
нэкве оставётэ рүпитан
махманэ пуссын пус-
тагыл вос олэгыт, мащ-
тырлан магыс сав ёрыл
вос пинавет.

Валентина
ХОЗУМОВА

Ты колт тав атахтем
тал рүпиты, савсыр
рүпата вэрыс, тованакт
мащтырыг вуйлаве, ань
тав ос кол үрнэ хот-
паг тот олы. Рүпататэ
урыл тох лави, ялпың
хоталыт хунь олыглэгыт,
тав павлың мащтырыт
юнтум пормасаныл ты-
налыанэ. Ос этипалаг
рүпатан хунь ёхты,
тонт ты тав мащтырлы,
нэмхотьют тавён торас
ат вэри, таквирот та
юнхсхаты.

Тав аги опарищ на-
ме щирыл Казамки-
на, щаняге-ащаге сас
хантыг олсыг. Тэн
Юлия агитэн самын
патме порат ты павылн
вантлысыг. Ты агитэн
школа юи-палт тэнут
пайтнэ нэг хаништах-
тас, астаме юи-палт
юв ёхтыс. Школат мощ
рүпитас.

Тувыл хум вэрыс, ань
хурум нйврам оныщи.
Ойкатэ ёт титтыг-ми-
насыг. Ань яныг пыге ват
нупыл ат талэ, котиль
пыге – ват нупыл акв
талэ, пити патта агитэ
лов талэ товлыс. Такви

тананыл янмалтыанэ.
Ойкатэ увщитэ палт
минас, Юлия ос тав
увщитэ ань сас акв
опарищ намыл олэг.

Таитэ наме Любовь
Васильевна, тэн ань
ойкатэ ёт община вэрыс,
салы ёвтсыг, салы урим
ворт олэг. Туристyg
яласан махум магыс
олнэ колыт унттысыг,
ворн ань сав хотпа
ёхталы. Яныг пыгён муй
махум ворн тотнэ магыс
усн яланты, тот лялты
хонтиянэ, тувыл оlnэ
мананылн та тотыанэ.
Юлия тэнатэн ос сака
нёты, салы котныл ла-
гыл маснут юнты, сав-
сыр сувенир вэри.

Люба увщитэ салы су-
ныл яласаңкв ёмашакв
хасы. Хот касыл вэраве,
тув та мины. Молты
тал Ханты-Мансийск
усн ёхталас, тыт касыс.
Тувыл Когалым ёст так-
ви ханты махманэ халт
касыс. Тох та аквёт
та олантэгыт, воссыг
хоталь вэрхатэгыт. Нйв-
рамыт янмалтаңкв ос
тыттуңкв эрэгыт.

Валентина ВАСИЛЬЕВА

Тав ӧпатэ Сукыръяныл ӧлыс

Касың тал туи порат ӧйттур ӧтпост соссаң махум Нефтеюганский район «Сказка» наппа ӱцлахтын ман маньхапыл касуңке вӧвиньталавет. Ты тал округ янытыл яныгсат арыгкем ӧлумхӧлас касуңке тув акван-атхатыгласыт.

Ялпың хӧтал ӧлум порат ам Зоя Николаевна Молданова ӧт вайхатыгласум. Тав ханты супыл масхатым ӧлыс, тамле суп Ямал мат ӧлнэ соссаң махум ӧныцӧгыт. Ам тав китыгласум, тав маньхапыл касуңке Ямал маныл ӧхтыс? Тав лавыс: «Ам Ямал мат Шурышкарский район Ӗгортит самын патсум. 29 тал Сургутский район Сытомино павылт ӧлӧгум. Ӗйкам Василий Афанасьевич Молданов мӧт яныгхӧтпат халт тыт касы, ам нас пумац магсыл тав ӧтэ тыг ӧхтысум.

Ам ань пенсият ӧлӧгум, ты ӧлы-палт сав тал павыл клубт рупитасум. Ман павлут тамле касыл ӧс щӧпиталыгласув. Ӗвлӧт соссаң махманув танки халанылт маньхапыл касуңке вӧвиньталсанув. Тувыл Сытомино павылт ӧлнэ махум акваг лавуңке патсыт, манрыг туп манки акван-атхатыглӧв ос мӧт мирыт тув ат вӧвиньталыянув. Ань тамле касыл ос ӧйттур ӧтпост щӧпиталаве, касың ӧлумхӧлас маньхапыл касуңке тот вӧрми».

Зоя Николаевна ӧйкатэ щирыл рутанэ Белоярский район Касум павылныл ӧлӧгыт. Щаняге-ащаге ос хосат тагыл Сургутский районын ӧлуңке вантласыг. Та маныл ӧхтум ханты щӧмьят Сенгеповыт, Молдановыт, Рандымовыт пуссын Ляма я вата

хосыт ӧлсыт. Тувыл тан Сытомино павылн пуссын ӧлмыгтасыт. Василий Афанасьевич Белоярский район Касум павылныл рутанэ маньхапыл касуңке ӧс ӧхталасыт, тан ӧтаныл ялпың хӧталт ващынтахтас.

Зоя Николаевна ос Ямалныл ӧхталам махум ӧт тот вайхатас. Ты урыл тав лавыс: «Ты ялпың хӧталт махум хул, пил ос мӧт тӧнут тыналасыт. Акв палаткат Ямал маныл ӧхтум махум савсыр тӧнут ос пормас тыналасыт. Тан Приуральский районныл тыг ӧхталасыт.

Ам касың тал Ямал ман рутанум палт муйлуңке ялантӧгум. Тот ӧлнэ ханты махум пӧс йис щирыл ӧлӧгыт, пуссын щань латңыл



Хумыт маньхапыл касӧгыт

потыртӧгыт. Амки ӧпарищ намум Ептина. Щанягум-ащагум потырталсыг, пӧс порат рутанув Хальӧс район Сукырья павылт ӧлсыт. Ӗпам маньщи хӧтпаг ӧлыс. Ӗс ян хул алыщлым яласаманыл Ямал мат ӧлуңке хулытыс. Ань Хальӧс районт Яптиныт ӧлӧгыт, улпыл, ам рутанум.

Сытомино павылт ӧлнэ ханты махум латңаныл ӧмашакве ханищтасум. Манки културав урыл акваг пумщалахтасум,

клубт рупитасум, соссаң махум магсыл ялпың хӧталыт акваг вӧрыгласув. Павлың мир магсыл округут янытлан хӧтал кастыл концерт, Ӗринӧква хӧтал, Витхӧн пурлахтан хӧтал ос сав мӧт ялпың хӧтал щӧпиталсув. Маньлат хӧтпат тув акваг вӧвиньталсанув. Савсыр мирыт халт ӧлым, танки пӧс йис вӧрмаляныл нупыл шар ат суссыт. Ӗвлӧт агитпыгыт тамле ялпың хӧталын ӧхталаңке шар ат касащасыт, ӧс-самтасыт. Щань латңыл потыртаңке ӧс ат тахсыт. Ань таи ӧмас, маньлат хӧтанув ос нявраманув културав урыл пумшалахтуңке патсыт. Ялпың хӧталыт ӧлыглан порат пуссын ӧхталӧгыт».

Зоя Николаевна лавыс, Сургутский район Сытомино павылт ӧлнэ хантыт пӧс йис вӧрмаляныл ат ӧрувляныл, пӧс махум холыт ялпың ман пурлахтуңке ялантӧгыт, танки Тӧруманыл нупыл пӧйкщӧгыт. Ань яныгхӧтпат маньлат пыгыт ты урыл потыртыяныл ос суссылтыяныл, таит ты вӧрмалит урыл ӧс вӧс вагыт.

Людмила ТЕТКИНА



В.А. Молданов ос З.Н. Молданова

Тюмень үст өлнэ маныщи хөтпав

Маныщи нэ
Галина
Павловна
Проскурякова
1970 тал пәсныл
Тюмень үст ҕлы.
Тот тав соссаҥ мир
магыс «Миснэ»
наппа культурный
фонд вәрыс, янас
колнакыл майвес.
Ты ҕылыттыт тав
тох ты потыртас:



Г.П. Проскурякова

– Тюмень үст савсыр мирыт
өләгыт – хатанит, белорусыт,
украинцыт, кәсыңаныл такви
организация ҕныщи, пуссын ак-
ван-атхатылгәгыт, культураныл
нөх-вөрмалтыяныл, аквәт
мүйләгыт. Ам ҕстох ҕлуңкве сака
тахсум, сымум щәргыс, манрыг
ман, маныщи махум, акван ат
хөнтхаталәв. Күщаит палтјасум,
ты урыл потыртасум, рүпитан
магыс колхусап вөвсум.

Ялпың хөталт ман, үст өлнэ
соссаҥ махум, акван-атхаталәв
– Хүл алышлан махум ялпың
хөтал, Ёринэква хөтал ос Тылащ
поры хөтал порат мүйләв. Ман,
нэ хөтпат, матыр сагөв, сакныл
савсыр пормасыт хартәв, супыт
юнтәв. Маныщи эрыг ванэ хөтпа
– эрги, щай аөв, үнлахөләв, манти
латнұвтыл потрамөв. Выставкат
ҕлыгланэныл порат катыл вәрум
пормасанув тув тотыглыянув. Ты
колуын ловмантем хөтпа акваг
өхталы. Ты коньпал махманув
ос ҕләгыт, ос пәс йис ҕлупсал
сака мат ат пүмшалахтәгыт.
Ялпың хөталыт порат тай өхталә-
гыт, мүйләгыт. Ты тал яңк нәтнэ
этпост ман ҕпаричанув пәс ху-
рит нөх-вуйлысанув, үс мирхалт
«Бессмертный полк» ләңхыт
өмсув.

– Галина Павловна, наң хөт
самын патсын?

– Ам Мулигорт павылт 1951
тәлт яңк нәтнэ этпос 19 хөталәт
самын патсум. Омам колхозт мис
поснэ нәг ҕлыс. Ман павылтөв
сака нәтнэ, карс мат үнлы. Элнаң
тот школа, няврам садик, ләпка
ос клуб ҕлыс. Махум пуссын хүл
алышласыт, вәраясыт. Хунь
колхозыт акван-түлвөсыт, павыл
махум мөт ман вантлысыт. Ман

колтәглув Восыңтүрн ҕлмыгтас.
Элаль ам Перегребный павылт
ханищтахтасум, интернатыт
ҕлсум. Татем ҕмас интернат ҕлыс,
тот ман маснұтыл майлувөсүв,
мүсхал щирыл тыттувөсүв,
өщвөсүв. Мощ ҕтылнұве Во-
сыңтүрт ханищтахтұңкве пат-
сум. Ам Наталя увщи ҕныщөгум,
тавань Восыңтүр павылт ҕлы,
нявраманэ пуссын колтәглы-
ңыг өмтыт. Андрей каңкум хо-
сат әтимыг өмтыс.

Ам хунь ат тәлум төвлыс,
омам юнсахтан машина өвтыс.
Такви мөрсың порат юнтыс,
ам ос маньтәгыт тот юнтуңкве
патсум. Өвләт нас матыр юнтсум,
простынит та маныр, тувыл супыт
юнтуңкве патсум. Нәлолов класс
әстлынэм кастыл амтинанум
выпускной суп юнтсум. Та порат
ам ты әгиришит ҕт ханищтахта-
сум – Люда Шевырина, Оля
Сюмина, Вера Шадрина, Нина
Самбиндалова, Люба Монина
ос Света Шесталова. Мән Вера
Каратаева ҕт Тюмень үсн
минуңкве номылматсумән. Ань
хұлысламән, тот юнсахтан нәг
ханищтахтан училище ҕлы. Эр-
нэ нәпаканмән тув кәтсанамән,
мощ ҕтылнұве мәнти минасамән.
Тув ань өхтысамән, училищамән
хөнтысламән, ос нәпаканамән
әтимыт, тув мус ат та өхталасыт,
хөт ләңхыт хотталы та тыпсыт.
Мән ювле та йисумән. Халыүст
ам лов класс әстласум. Школа
директорыг төнт Севастьянов
ойка рүпитас, тав аңум ки-
тыгласә, эрың Ленинград
үсн Герцена наппа институтн
ханищтахтұңкве минәгум, тот,
ләви, маныщи ос ханты няврамыт
ханищтахтәгыт. Ам рущ латың

ос литература ханищтаңкве
сака ат тахсум, ос математика
ман физика тай эруптасум.
Щань ләтнұмтыл потыртаңкве
хәссум, омав маныщи ос ханты
ләтнұл потыртас, ман ос кит
ләтың вәсүв. Тув минуңкве ат
кәсашасум, Людмила Шевырина
өт Тюмень үсн минасамән, №
16 текстильщикыт училищан
поступитасмән, өлнэ колнакыл
майвесамән. Тот ханищтахтұң-
кве мәнәмән сака мүстыс. Сав-
сыр йиквыт ханищтасмән –
венгерский, украинский, татем
йиквсумән, коцерытт выс-
тупайтасмән. Училищамән
әстламумән юи-пәлт, хунь
комвольный комбинатыт
рүпитасмән, мән ос акв тох
концерыт ҕт яласасмән,
йиквсумән, эргысамән. Сака
каркам әгийг ҕлсумән. Людмила
ань ос Тюменьт ҕлы, щөмья-
ңыг өмтыс, мән вәтихал вә-
щинтахтәлымән, юртыңыщ ҕлы-
мән. Ам акв пыг янмалтасум.

1988 тәлт ам юил-ялтаным
Москва үст өлнэ Текстильный
институтыт ханищтахтұңкве
өвылтахтасум, 1993 тәлт тавө
әстласум. ТапоратүсувтКомитет
по делам национальностей
вәрвөс. Ам хұнтамласум, тув
ань соссаҥ хөтпа рүпитаңкве
кинсавө. Тув минасум, нәпаканум
вуйвөсыт. Ғтыл вөвавөм, ләве-
гыт, өхталән, тыт рүпитән. Тув та
патхатасум. Та порат «Спасение
Югры» ассоциация пүсвөс, соссаҥ
мир ҕлупса нөх-вөрмалтаңкве
патвөс.

Ханты-Мансийск үст увшим
әгитэ ҕлы, Маина Ефимовна,
тувыл ос рүтум Альбина Ни-
колаевна Мехнина (әги ҕпарич
наме Шесталова). Тән палтән
мүйлуңкве өхтысум, тыт мощ
өләгум.

Ань потрумән та оигпас. Га-
лина Павловна хөтпа нұпыл
сымың нэ, мұтраң әлумхөлас.
Такви мәтэ, рүтанэ тав сака
эруптыяңэ, янытлыяңэ. Галина
Павловнан ам сав ҕмас, сымың
ләтың ләвегум. Пустәгыт вөс
ҕлы, Най-Отыранән вөс үрга-
лавө!

Светлана
РОМБАНДЕЕВА

Соссаң махум эрнэ нэпак щёпитасыт

Ты элы-пал газетат мән Нижневартковский район Мегион үст соссаң махманув хонтхатыглапаныл ывылтыт хансыгласув. Ань потрув элалъ мины. Ты «Хатлые» нампа Региональный музейный фестиваль оигпаме элы-палт тот пуңк тотум хотпат резолюция-нэпак щёпитасыт, акван-атхатам мир нупыл ловиньтасаныл. Маныр тән тот хассыт, ты урыл ань элалъ ловиньтэн.

– Мән тыт соссаң мирув олупса ос культура ывылтыт потыртасув, воряң мат олнэ махманув потраныл хунтлысүв, щар мак эрнэ тэлат пуссын нэпакын хассанув, тувыл ты нэпакув щёпитаслүв. Нан ань элалъ мән хансум потрув ловиньтэлйн:

Округ Правительстват рүпитан махум, округ культура департаментыт ос округ янытыл олнэ ма-вөй нөх-винэ департаментыт рүпитан хотпат, таяныт емас варен, номтанув тэлаг емтнэныл магыс манавн таи нётэн:

1. Мән олнэ мавт рүпитан яныг күщайт соссаң махманувн эрнэ нэпаканыл таратаңкве вос нётэгыт: Ый йиквнэ вармалъ порат эргын эргыт, ханты манос маньщи хотпат танти варум эрганыл.

2. Округ культура департамент «Хатлые» Региональный фестиваль окружной намыл вос пинытэ.

3. Щань латың ханищтан ос Ый йиквнэ вармалъ магыс Мегион үст олнэ Экоцентрыт янас колнак вос щёпитаве, тот соссаң хотпанупыл сымың махум рүпитэгыт, тувыл ос хотал нэглын ерт олнэ ханты махумн та мус яласаңкве кустыр.

4. МАУ Экоцентр «Югра» нампа Музейно-этнографический ос экологический парке нётмил олныл вос миве.

5. Щань латың ханищтан тэла мұсхал щирыл нэпакын вос хансаве, ос мак та урыл номуңкве эри:

– ты тэла ванэ мирхал мат олнэ хотпат ет вайхатаңкве эри, тән етаныл рүпитаңкве, латчанув ос культурав акв ёрыл нөх вос вормалтылүв;

– соссаң хотпанув пёс йис пормас ос маснут ханищтан тэла палт мұсхал щирыл вос вуйхатэгыт, эрыг ос мөйт, тувыл хорам яктын вармалъ мұсхал щирыл вос ханищтыяныл, тарапаттыяныл. Ты тэла хосыт тах соссаң махманувн рүпитаңкве күпнитнувөг емты;

– Ый йиквнэ вармалъ ывылтыт эрнэ нэпакыт щёпитаңкве эри, ты вармалюв магыс акв кол вос оныщев;

– мөйт, эрыг ос Ый йиквнэ вармалъ ванэ махум мананыл ищхипың ут хосыт акван вос хансавет, мән олнэ мав янытыл тамле хотпанув пуссын тарапаттуңкве эрегыт;

– туристыт магыс яласан лөңх нэпакын мұсхал щирыл вос хансаве, тән соссаң махманув палт



П.Я. Айваседа

С. Ромбандеева баруңхуриг

мән павлытын вос ёхталэгыт – Варьёган, Аган, Корлики ос Вампугол, касың павылт ань музейт олэгыт, мащтыр хотпат ос пёс потрыт ман мөйтыт ванэ махум олэгыт;

– «Югра многоликая» проект кастыл манавн аквьёт савсыр хонтхатыглапыт ос проектыт варуңкве эри;

– соссаң мир щань латчаныл ос пёсийс пормасаныл, маснутаныл мащтырлан семинарыт варуңкве эри;

– ань яныгман няврамыт магыс соссаң мир олнэ мат ос Экоцентрыт Ый йиквнэ вармалъ ывылтыт хонтхатыглапыт вос вэрыглавет, маньлат махум ты тэла вос ваганыл.

Тамле резолюция-нэпак ты махум щёпитасыт: округ Дума депутат нэг-хумыг Т.С. Гоголева ос Е.Д. Айпин, педагогический наука кандидат Р.Н. Шайхулов, Мегион үст олнэ МАУ «Экоцентр» мат научный сотруднигыг рүпитан нэ А.И. Мингалимова, исторический наука кандидат Т.А. Молданов, МАУ «Экоцентр» күщай ваңын нэ Н.Е. Бренич, экскурсия тэла палт күщайг олнэ нэ А.А. Горлова ос соссаң хотпат – П.Я. Айваседа, С.А. Айпин, Л.Н. Айпин, В.А. Тылчин, А.Д. Казымкина, М.Ю. Казымкин ос мот махум.



Соссаң махум Краеведческий музейт послувёсыт

Светлана МАТВЕЕВА

Варъёган павылт ӧлнэ хӧтпа

Ты фестиваль ёнта пасан вӧтатёт акв яныгхӧтпа Павел Янчевич Айваседа потыртас. Ты ӧйка «Почётный житель Нижневартковского района» намыл маим ӧлы. Такви мире магыс тав сӧв ёмас тӧла вӧрыс, ань тыхӧтал мус рӧпиты. Нӧн ань ӧлаль тав потре ловиньтӧлын.

– Ам щӧнь лӧтың урыл лӧвункве таңхӧгум. Хӧтпа такви лӧтҗе ат те вӧгтэ, тав ханты манос мӧньщи хунь – тав руш ӧлумхӧлас. Интернатит ханищтахтамум порат, амти лӧтҗумтыл потыртаумум мӧгыс воспитатель ӧкван колсӧмын кӧтыглавӧсум, тот ань акв щӧс вос лӧлӧгум, мольщӧнум масылум те – кит щӧстем лӧлӧгум, нӧрагум масыгум – хӧрум щӧс лӧлӧгум. Ань ос нӧврамыт ӧрвӧгыл ханищтавет, сӧвыңпӧлэ тӧнти лӧтҗаныл ат вӧганыл. Мӧн хотыютн хунь ханищтавесӧв, лӧтҗув мӧнти ханищтаслӧв. Ам омам ханты нӧ ӧлыс, ӧщум – ӧрн хум. Кит лӧтҗыг амти ханищтасагум. Округт ӧлнэ ӧрн мӧхум ханты лӧтҗыл потыртаңкве пуссын хасӧгыт.

Ань нӧврамыт щӧнь лӧтҗылханищтанмӧгыс ёмас хӧтпат вос ӧлнувыт. Ханты мӧхум халт тамле ханищтан хӧтпат ӧлӧгыт, ты Евдокия Андреевна Нӧмысова, Еремей Данилович Айпин, Владимир Егорович Енов. Атпантем тӧл мины, та сыс тах лӧтҗув хотталь сӧйми, мӧн пуссын рушиг ӧмтӧв – тах акв соссаң хӧтпа ат хулыты.

Ёнта пасан вӧтат потыроигпам юи-пӧлт ам Павел Янчевич ӧт потрамасум. Тав Нижневартковский район Варъёган павылт самын патыс, ӧйттур

ӧтпос 20 хӧталт 1941 тӧлт. Самын патум пӧвлӧт яныгмас, нилыт класс мус ханищтахтас. Тӧнт атыт класс яныт нӧврамыт пуссын Сургут ӧсн тотыглымат, тот ӧлаль нӧлолов манос лов класс мус ханищтахтасыт, интернатит ӧлсыт. Павел Янчевич та тӧланэ ӧвылтыт тох ты потыртас:

– Та порат нӧврамыт округ янытыл сӧвсыр пӧвлытныл пуссын Сургут ӧсн тотыглавӧсыт – Самаровский, Октябрьский ос Хӧльӧс районытныл, Ларьяк пӧвлытныл ӧлсыт. Акв пыг Чульчамы пӧвлытныл ханищтахтас, ты пӧвыл ань ӧтим. Ам тот нӧлолов класс ӧтласум, тувыл Ханты-Мансийск ӧст лесникиг ханищтахтасум. Училище ӧтсламум юи-пӧлт акв ӧтпос туп рӧпитасум, армиян вуйвӧсум. Камчатка мӧт морфлотыт хӧрум тӧл лусытасум.

Армия юи-пӧлт ам Василий Васильевич Бахилов ӧт рӧпитасум, та порат тав Сургутский райком партият первый секретариг рӧпитас. Вӧрың мӧ уральтан инспекторыг паттувӧсум. Ӗтпостем туп рӧпитасум, командировкан кӧтвӧсум, тот ань лӧглум хотняхсатас. Я-ты, ань хумус рӧпитаңкве патӧгум. Тувыл кӧщай



Павел Янчевич ӧкватӧнтыл лӧляхӧлӧг

ӧйка ам нуплум лӧви: «Тациңк наңти пӧвлын минӧн, тот Партийный организация секретариг рӧпитӧн». Ам тот вӧт нупыл ат тӧл рӧпитасум. Тувыл Василий Семёнович Сондыковын Нижневартковский райисполкомын рӧпитаңкве вӧввӧсум, ос тув патхатасум, юил ялантым рӧпитасум, тувыл пенсиян минасум.

– Павел Янчевич, наңти колтӧглын ӧвылтыт акв-кит лӧтың лӧвен.

– Мӧн колтӧглувт лов арыг нӧврам ӧлыс. Ӗщум омам ӧт акван-минамӧн ӧлы-пӧлт ӧква ӧныщас, тӧн сӧв нӧврам янмалтӧлсыг. Ӗтӧм ос омам хунь акван-ӧлмыгтасыг, ягыганум ос ягӧгиянум пуссын щӧмьяңыг ӧлсыт. Ӗтылнув ам самын патсум, юрт нӧврамыг ӧлӧгум, аквам иң мӧнь тӧгыл ӧтимыг ӧмтыс.

Ам ань хӧрум нӧвраманум ӧлӧгыт. Маргарита ӧгим Варъёгант нӧврамыт ханищтым рӧпиты. Аркадий пыгум ӧс ханищтан хӧтпа. Колтӧглӧтыл Ямал мӧт

Тарко-Сале ӧст ӧлы. Наташам ӧвлӧт Ханты-Мансийск ӧс колледжит учителиг ханищтахтас, мощ ӧтылнуве ос юридический факультет ӧстлас. Тӧн оманыл, ам сӧр ӧквам, наме Татьяна Степановна ӧлыс, ӧги ӧпарищ наме Сардакова. Мӧн школат аквӧт ханищтахтасмӧн, тувыл акван-минасамӧн, нӧвраманмӧн самын патсыт. Тав сым ӧгмыл хартыс, тоха та ӧтимыг ӧмтыс.

Ам амти пӧвлумт ӧлӧгум, мӧт ӧква тотсум, наме Елизавета Даниловна Василькова. Ты Еремей Данилович Айпин тав яныг увщитӧ. Тав ты ӧпщитӧ янмалтастӧ, акваг нӧтыстӧ. Ӗквам ӧт мӧн вӧт нупылаттӧлты ӧлымӧн.

Павел Янчевичин потре мӧгыс ам пӧумащипа лӧтың лӧвсум. Ӗкватӧнтыл халӧнт юртыңыщ ос ӧрпыңыщ ӧлӧг, хӧтпа нупыл сымың ӧкваг-ӧйкаг. Пустӧгыл вос ӧлӧг, Нӧй-Отыранӧн вос ӧргалавӧг!

**Светлана
РОМБАНДЕЕВА**

Пёс пормасыт суссылтан кол

Нижневартовский район Мегион уст олнэ МАУ «Региональный историко-культурный и экологический центр» кол Краеведческий музей оныщи. Ты центр 1987 талт руш нэн Виктория Ивановна Сподинан вэрвес. Та порат тав школат история учителиг рупитас. Ты нэ ань Ханты-Мансийск уст Ыс-угорский институтт кўшаиг олы. Экоцентр кўшаиг Руслана Богдановна Галив тав паттувес.

Краеведческий музейн округ янытыл олнэ сossaн махум

катыл вэрум маснутаныл, савсыр пормасаныл ос алышлапаныл акван-атым олэгыт. Тот рупитан хотпат яныг тэла вэрегыт – наука щырыл рупитэгыт, нэпакыт таратэгыт, пёс йис пормасыт акван-атэгыт, суссылтапыт вэрыглэгыт. Ты коны-пал тот хаништан хотпат магыс сыресыр курсыт ос семинарыт олыглэгыт, школат хаништахтан ос садикын ялантан нэврамыт магыс янас суссылтапыт щёпиталавет.

Светлана МАТВЕЕВА



С.Ромбандеева вэрум хурийит



Лўимā сэрпос

(Северная зоря)
№18 (1132), 22.09.2016

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467)33-36-82

Ответственный секретарь –
Узель В.В.
Редакторы – **Мерова Т.С.,**
Теткина Л.И.

Телефон (3467)33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Подписано в печать:
по графику 22.09.2016 г.
в 9.00.; фактически
22.09.2016 г. в 9.00.
Индексы **04399, 54399**
Тираж **1750 экз.**
Заказ **1859**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.